

中國方志叢書·華中地方·第八三〇號

據

清·孟昭等修，黃祐等纂
清乾隆二十四年刊本

影印

江 西 省

建昌府志

(公)

成文出版社有限公司印行

中華民國七十八年三月臺一版

建昌府志

全八冊

發行人：黃 成 助

台北郵政信箱二二六〇五號

出版者：成文出版社有限公司

台北郵政信箱二二六〇五號

台北市南京東路三段270號9F

電話：七四一五四三二一九

印刷者：上林彩色印刷有限公司

台北市大理街145號

新聞局出版登記證：局版台業字第一一四三號

怪也然曾生不非同進不罪有司告予以歸思廣其學而堅其守予初駭其文又壯其志夫農不咎歲而菑播是勤其水旱則已使一有穫則豈不多耶曾生橐其文數十萬言來京師京師之人無求曾生者然曾生亦不以干也予豈敢求生而生辱以顧予是京師之人既不求之而有司又失之而獨余得也於其行也遂見於文使知生者可以弔有司而賀余之獨得也

送余疇若南豐掌學序

李觀

工必以般者爲其材巨木作寢廟也彼環堵則何工不可御必以良者爲其策天驥逐光景也彼一駑則何御不可師必以孔子之徒者爲其師善性入訓典也彼曲藝則何師不可

今天下號多士而南豐大邑也讀儒書者蓋百數薦於鄉第
於廷往往有之大理丞周君出宰之一年乃立學於先聖之
廟命吾友余堯輔掌其教夫周丞之明豈曰邑之人未嘗學
且師耶若是則服大袂之衣與令長抗賓主禮者何自出也
是其有學有師久矣然猶汲汲於斯者其將以先王之道浴
而薰之耳其將使其聞仁義忠信之說知夫古之所謂儒者
如彼其大也然後進可以治乎國退可以齊乎家出乎已而
加乎人罔不曰宜者是周丞上爲天子育人材下爲一邑減
爭鬪之獄也不然何地不可居何人不可法何必縣學之興
而堯輔教之耶堯輔好古博學慷慨有行義斯足以應周丞
之指惟學者何如耳至之日以吾言告之謂之是耶請在下

風以實謂之非耶敢因是而弔焉

送致政吳君詩序

王无咎

南城吳君穆祥符中嘗舉進士後三十有三年曰皇祐之癸巳推恩先朝進士乃以文學賜君出身而得補郴州郴縣主簿考將足乃慨然嘆曰吾筋力耳目覺已衰耗安能役役久勞於卑仕耶卽以其政還於上而歸凡吏於郴者與夫道路所見士大夫多爲詩以送之詩之意大抵高君之退也初君爲學尤刻苦自勵書蓋未嘗釋於手而所爲文辭牽聯裁裁曲中繩墨故屢效於有司而屢被舉送性寬平修謹每與人接言語不妄肆而忻忻和易以致其恭故無貴賤疏戚皆以君之爲人可愛也今其歸也幽鄉長谷之中有宅一區田環

其旁以畝計者蓋二百餘畝流其間激激清冽而烟雲紛蔚
於早暮花木繁鮮於四時耕釣歌吟其資之素立如此亦足
樂也今世之仕者往往有濡忍垂老之年計較分毫之得而
黽俛於苟賤之間非至於降謫罷黜則死而後已以彼之卑
而視君知果退之義蓋可尙也作詩之意予故不能加也顧
猶未盡識君之行更有可愛而勢亦有可樂者故予兼道此
以冠其端將使其事得與諸君之詩俱傳於世云

南豐先生年譜後序

朱子

世有著書稱公文章者予謂庶幾知公求而讀之湫然卑鄙
知公者不爲是言也然則世之自以知公者何如哉豈非徒
以其名歟予之說於是信矣其說又以謂公爲史官薦邢恕

陳無已爲英錄檢討而二子者受學焉綜其實不然蓋熙寧
初詔開實錄院論次英宗時事以公爲檢討一月免豈公於
是時而能有以薦士哉其不然一也恕治平四年始登進士
第元豐中用公薦爲史館檢討與修五朝國史其事見於實
錄矣爲實錄院檢討而與修英錄於熙寧之初則未有考焉
其不然二也師道見公於江漢之間而受教焉然竟公時爲
布衣元祐中乃用薦起家爲郡文學是公於史館猶不得以
薦之况熙寧時豈有檢討事哉其不然三也一事而不然者
三則公所以教恕者其在元豐史館之時乎未可知也此予
所謂牴牾者斯人爲世所重又自以知公故予不得不考其
實而辨其不然者其書世或頗有以故不論著其非是者焉

送曾參父序

張 栻

予聞南豐曾裘父之名舊矣所謂直諫多聞古之益友歟今年秋始見之於長沙則非特如前聞抑有過焉蓋將潛心夫太學之源其所立未易度量也予念世衰其學者鮮天資秀美之士往往爲他岐所陷溺而不反及見吾裘父立志之遠且大也願交之心豈不慰哉然會面未久而裘父歸於予心拳拳有不能已者雖欲無言得乎嗟乎道之不傳也久矣維天之命於穆不已無一息之或間無一氣之或停太和保合品彙流形則道豈有隱而不傳者乎其不傳也人自隔之耳人奈何而隔之物欲誘引偏倚滯吝拘於形器而不能通也將以極夫上達之事豈可不深惟之乎人受天地之中以生

有是心也天命之謂性精微深奧非言所可窮極而妙其蘊
者心也仁者心之所爲妙也仁之意至親切而親切不足以
形之仁之體至廣大而廣大不足以名之然求之方夫豈
遠乎卽吾視聽言動之著不可掩也有能於此達其端而會
其源超然得之於形器之表則洋洋上下體物不遺入仁而
道不窮矣極其致則天也由孟子以來蓋千有七百餘歲河
南程子實聞而知之某也學於程子之門者也豈能盡窺宮
牆之美哉以其所知而言之未知合與否也憂患不交獨以
致朋友切磋之義而因以求益云異時重逢相與察日新之
得則斯言亦或有取焉爾

送左縣尹序

元吳澄

宋初割撫州之南城縣置建昌近郭多石山巖險麤礪故其民俗剛毅士生其間其行往往峭峻介特蓋其形勢然也南城之東南鄙士民接壤析爲新城縣其山獨奇秀明麗而民俗士習亦肖之宋三百年儒科相尙撫之縣五建昌之縣四九縣之中其八縣之登進士科者豈無長才異能而僅占第二人以下惟新城縣有進士第一人謂人物之無闕於山川形勢不可也宋亡儒科廢後四十年始復而士以善書服勤于翰林國史院者歷月九十則出仕與進士之高等同恩數渥矣然南士之得與斯選者厥惟艱哉貢舉初行時予于校文得一士曰饒樸新城人文工行淳良士也其明年試禮部報罷以特恩厠儒學教授選中予薦之於集賢充國子助教

而未用也今承乏詞館又於史屬得一士曰左祥亦新城人
才優守固良吏也新受承宣郎廣州路香山縣尹而去予於
是益信新城之山川多產英彥也夫其才之優也必能有裨
益於民其守之固也必能無玷缺於身祥也往哉聞廣東之
郡縣有以良吏稱者必子也夫

送太守舒君之任建昌序

明 羅 玘

建昌府撫信邵汀贛之中也歲贛之曠幾撫之饒遠信之衝
鄰汀之僻與邵並閩楚之喉焉諸府之中號爲樂區南城
附郭縣也近撫信次水而多商新城南豐負邵廣昌逼贛與
汀山岫域之境惟力耕之民故天下當無事三縣之民不出
封疆而食其土之入以傲乎南城逐逐於外者及其有事廣

三先受贛汀之寇南豐新城次之而其鋒亦無至於南城之
烈然藉鄉兵爲之戍行齎居送其受毒猶寇也獨汀漳漳氛
埽境而入南城以遠而盪渙之其毒民以札差減於三縣三
縣廣昌特甚又其競奢以角負氣而囂至搥登聞爲常事若
有以鼓舞夫二縣者以故戶口日益耗而二縣亦隨而受其
敝南城自古迄茲幸無之然其湮井百戶竈千餘徙廟學墜
浮圖鏿隆實窪築爲王宮由是燕語載路袒裼蹴踘於畫褫
衣禦貨於暮怯饒剽攻於夜今有之他縣不與焉然而增賦
重役不出十年亦當與南城俱告困矣然則惡在其爲饒且
僻哉而亦何異於曠與衝也乎雖人盡商也固無補也而亦
何必寇與贍之毒也乎如是而猶冒焉曰是樂區也其果樂

予嗚呼繼今而爲之吏者亦難矣況於守乎哉當是之時而
槩以爲守者當之其患亦未易涯也然則諸府之憲賢守也
有若建昌之憲者乎由是觀之雖以舒君之賢天子固不得
而靳君亦不得而辭也或吾邦樂區之名天亦未忍遽奪之
也耶是蓋吾之私以爲慶而其刑曹諸僚又喜夫君之利器
遇盤錯而將試也試始吾邦以吾邦人當役使序也故序之

送趙君尹南城序

羅 玘

吾縣域民以隅關鄉區爲號隅有四關如之鄉加隅之一區
視隅則四之隅城四隅也隅東坊關城外也謂郭也關東廂
關之外爲鄉鄉東都都凡七十有三都東里里凡二百四十
有五里有長合坊廂之長二十有三凡爲二百六十有八以

分耕於四四之區區凡三長合爲長四十有八蓋二百六十
八之長皆聽命焉以督夫二萬七千有奇之租留漕先折而
歲會於戶部其茶菌餽牲之品之達於禮部以轉於光祿羽
革弓矢五金丹汞百需之供於工部以轉於他司則二百四
十五之長朋輸之飲祭賓興使旅供給之費部使迭迎騎乘
之出藩國儀衛之役歲時之候則二百六十八之長參焉無
所與乎四十八之長也若佚矣然四十八家之承代也其名
曰僉僉云者衆所舉之詞也故至數十年近且十年不得比
二百六十八家之歲踐更焉人亦久而舍其業次者蕩產者
往往嚙呻咨嗟以戚幸一釋去以爲更生二百六十八家者
十歲始一值而亦當其輸也每愆其期聞有鎗殘其膚者矣

戮創其脰者矣噫吾未毫毛爭先取勝恥後焉以悅其長上
者吾不及見歟其豈非吾縣之民歟今也何爲至是耶其亦
豈非吾縣之民歟官之斂也日增而民之生也日蹙而已耳
縣官者受之於其所臨轄者也胡能損其增也緩之而已矣
胡能展其蹙也息之而已矣雖然息非緩不能也然緩則於
其身也時有譴焉爲民而獲譴不怨且不變非君子不能也
是誠在諸令尹新令尹太平趙君吾知其君子也於其行也
故敢以告

送刑部尙書何公歸肝江序

李東陽

天下之書士所當誦習而施用者若經史文賦章程法比雖
其論議有大小淺深之殊而惟用之適顧專攻者或湜於偏

滯博取者或失於泛濫皮膚口耳之學無所往而適於用斯
患也亦恒有之故倪寬以經術飾事雋不疑以經義斷獄嘗
儀讀書以爲翰林歐陽能文章以爲參政孔休文解朝儀以
爲郎官學之不善則雖經如陸贄文如柳宗元不免爲罪人
法令如張湯不免爲酷吏典故如陳彭年不免爲佞夫揆其
所就而所學可知矣若用舍顯晦則皆時之所爲豈君子之
所計哉刑部尙書肝江何公愛尙書學舉進士以博洽聞爲
部屬遂精法律同署者皆自謂不及爲大臣出行荒政則先
賑貸蓋取諸周禮制邊防則先撫恤次攻伐蓋取諸春秋至
於議大政斷大獄則雜取諸子史百家之言皆有所依據不
爲空撰臆說苟且滅裂之事非庸流悍吏之所敢望又以其

餘爲著述爲詞賦皆合體裁該時制鑿鑿乎若不可闕者要其所學可謂專而不滯博而不濫者矣而公益篤嗜不厭雖家無贏貲食不重肉而諷誦抄錄恒若有餘雖剖決如流庭無留案而稽據探索恒若不足其所施用愈多而愈不窮故登朝歷省人皆想望翹企以冀其來及其解簪組歸田園則惋惜不暇以爲不易得蓋公自掌邦政以來有所拂嘗累月不視事上疏乞歸者亦屢矣察其意殆將斂未究之事業於不朽之文章去留進退無所往而不得其樂者著宋論人固有見之者矣又嘗欲輯國朝諸制作爲一代之典而尙編未究其所自爲文章不與之並傳於後也哉夫政雖大固尤分曹限職有所不得爲文則天下之大無所不得與其